

REGIONAL NEWS BULLETIN

HEADLINES (EVENING)

- 1. Mizoram sorkar chuan vawiin atangin a thawh hnihna atan sawhthing a lei tan.
- 2. Mizoram sawrkar sikul zirtirtu inzawmkhawm chuan sawrkar laka an lungawilohna lantir nan vawiin atangin an hnathawhna hmunah "Badge dum" an bel tan.
- 3. Mizo Academy of Letters Book of the Year 2024 atan Hun Inher Kara Zofate tih F. Vanlalrochana ziah chu thlan a ni.
- 4. Khawvela Roman Catholic Kohhran hotu lu ber, Pope Francis-a chu hun rei tak a damloh hnuah vawiin khan a thi.



GINGER

Mizoram sorkar chuan vawiin atangin a thawh hnihna atan sawhthing a lei tan.

Mizoram Agricultural Marketing Board Managing Director, Pu Lalhmingmuana chuan Akashvani zawhna chhangin, vawiin atanga a thawh hnihna atana sawhthing an lei dan tur chu a thawh khatna nen a inang lo tih sawiin thawh hnihna an kalpui tur chu ruahmanna awmze nei zawka kalpui an tum tawh thu a sawi a, Mizoram pumah sawhthing dahna tur, secondary collection centre 62 an siam tih sawiin, heng atang hian vawi leh khata an lei huk tawh dawn lova, sawhthing lei thawh khatna a an la lei ve lohna khua te an ngaipawimawh dawn tih a sawi a ni.

MAMB Managing Director chuan Marketing board chuan Mizoram sorkar sum tam tak hum zawnga sawhthing lei an tum tih sawiin, tun dinhmunah sawhthing leikhawm sa te chu man to zawka hralh vek an tum a ti a, Tun dinhmunah India-ah sawhthing man a san loh avangin Mizoram chu hmun hla leh kalpawh harsa a nih avangin sawhthing lei tur ten an pan hnuhnun ber a nih thin avangin sawhthing man chu a sang thei lo tih a sawi baw.

Pu Lalhmingmuana chuan kumin February ni 20 atanga vawiin thlengin Mizoram pumah loneitu 8820 te sawhthing thar chhuah quintal sing 7, sang 2, 460 lei sak tawh anga chhinchhiah a ni a ti a, a thawh hnihnaah hian sawhthing quintal nuai 2 dawn lei hmabak an la nei nia an hriat thu a sawi baw.

Hetihlai hian Akashvani chuan sawhthing thartu loneitu thenkhatte a biak pawhna ah Serchhip District-a Zote South khaw mi, Pu H Lalrintluanga chuan Mizoram sorkarin sawhthing a leisak dan chu thingtlanga loneitute tan

buaithlak thu a sawi a, sawhthing lei thawh hnihna hunah hian sawhthing lin a hun leh tawh avangin cho hman pawh an awm tawh rih lo tih a sawi.

Pu H Lalrintluanga chuan Sorkar in February ni 20-a sawhthing lei runpui a neih bak chu a chawlh tak vang vang avang leh a chawlh chhungin sawhthing chawh khawl a phal si loh avangin nakum lama sawhthing chin tumte leh sawhthing a eizawng tak takte tan buaithlak a tih thu sawiin, Mizoram sorkarin sawhthing a lei dan chu thingtlang lonei mite tan a lungawi thlak loh a tih thu a sawi a ni.

<><><>

GOVERNOR : SOLDIERATHON

Larsap, General (Rtd) Vijay Kumar Singh chuan nimin khan 'AHRR Delhi Soldierathon 2025 - Run with Soldiers and Run for Soldiers' tih thupui hmanga buatsaih chu Army Hospital Research & Referral, Delhi-ah Khuallian niin a telpui a, Soldierathon-a tel mi 4,000 bawr velte chu a vailiam.

He marathon hi 'Fitistan - Ek Fit Bharat' te buatsaih niin, sipai hliam tuarte enkawlina hmun, Paraplegic Rehabilitation Center, Kirkee, Pune tanpui nana ruahman a ni a,

Larsap chuan Soldierathon buatsaihah a tam thei ang ber an tel ngei theih nana hmalak a nih thu sawiin, hemi kaltlang hian mipuite pawh sipai rualin an tlan theih bakah, taksa sawi zawi nana tlan pawimawhna zirtir pah tum a nih thu a sawi a. Soldierathon-ah mi 4,000 bawr vel an inziahluh thu a sawi bawk.

Soldierathon hian ram tana martarte leh hliampui tuarte chawimawi a tum a. Ram pumah ram tana nunna hlu tak hlantute ngaihhlutna, abikin thalaite'n an chin deuh deuh theih nana hmalak chu ngaihpawimawh a ni a. Chhum lo chat lova ram venhim hna thawktu, inpumkhatna leh ram inrelbawlina vawnhim kawnga hmalatu sipaite chhuanna thinlung mipuiteah tuh a tum a ni.

<><><>

MIGOSTU PROTEST

Mizoram sawrkar sikul zirtirtu inzawmkhawm chuan sawrkar laka an lungawilohna lantir nan vawiin atang khan an hnathawhna hmunah "Badge dum" an bel tan.

Mizoram sawrkar school zirtirtu inzawmkhawm chuan sawrkar hmasa in zirna hrang hrang dinhmun sang zawka a hlankai te tuna sawrkarin dan siamthat ngai leh fello chhuanlama a paih chu provincialised status-ah dah let phutin, vawiin April ni 21 atanga Zirtawpni, April ni 25 thleng khian an hnathawhna hmunah badge dum an bel vek dawn a, Mizoram Govt. School Teachers Union (MIGOSTU) chuan sawrkar hmasa in dinhmun sang zawka zirna in a hlankaina provincialised status chu tun sawrkar Cabinet thukhawmin a hnawl bakah High School leh Middle School Headmaster kum tam tak lo thawk te zirtirtu pangaia an tlak theihna tur an rawn telh thar an ti a, heng Cabinet meeting in a rel te chu a rang thei ang bera ngaihtuah that leh ni se an duh tih sawiin Provincialised status ah dah let an duh tih an sawi.

MIGOSTU chuan a tehfung an hmanna ah thingtlang leh khawpui inang renga an siam chu diklo an tih thu sawiin, thingtlanga school te tan kaisan ve theihna a awm tawh dawnlo nia an hriat avangin dan thar an siam chu sut leh vat turin an phut tih an sawi bawk.

MIGOSTU Secretary Pu J. Lalvarliana chuan Akashvani zawhna chhangin, lungawi lohna lantir chungchangah hian thuneitute lam atangin engmah inbiakrem tumna an la dawng lo tih a sawi a, vawiina ZPM chhung inkhawmnaah Education Minister Dr Vanlalhlana chuan an lungawi lohna an lantir dodal zawng hian thu a sawi nia sawiin, MIGOSTU chuan lungawi loh lantirna hi kaltlangpui an tum thu a sawi bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

MAL BOOK OF THE YEAR

Mizo Academy of Letters Book of the Year 2024 atan Hun Inher Kara Zofate tih F. Vanlalrochana ziah chu thlan a ni.

Mizo Academy of Letters chuan nikum 2024 chhunga Mizotawng a lehkhahu chhuak 215 zinga lehkhahu tha ber, Book of the Year 2024 atan Pu F. Vanlalrochana ziah 'Hun Inher Kara Zofate' tih chu vawiin khan a thlang a, Book of the Year 2024 lawmman hi naktip, April ni 23 khian I&PR Auditorium-a MAL Foundation Day lawmnaah hlan a ni ang.

Health Minister Pi Lalrinpuii chuan a social media account kaltlangin Mizo Academy of Letters in kum 2024 chhunga Mizo tawng a lehkhahu chhuak 215 zing atangin Mizo tawnga chhuak lehkhahu tha ber Book of the Year 2024 atan 'Hun Inher Kara Zofate tih F. Vanlalrochana ziah a thlang chu thinlung taka a lawmpui thu a sawi a. Ram rawngbawlnaah zia mite an pawimawh thu leh hnam lungphum pawimawh tak an nih thu sawiin, Pu F Vanlalrochana leh zia mi dangte chu zia zel turin duhsakna a hlan nghal a ni.

MAL hian kum 2024 chhunga Mizotawng lehkhahu chhuak 215 atanga tha zual, top 20, top 10 leh top 3-Hun Inher Kara Zofate - F. Vanlalrochana, Ka Hringnun Leikhaphok (An Autobiography)- Lalfak Zuala leh Par Har 2-Dikte Hnamte te chu a lo thlang chhuak tawh bawk a ni.

<><><>

POPE FRANCIS DIES

Khawvela Roman Catholic Kohhran hotu lu ber, Pope Francis-a chu hun rei tak a damloh hnuah vawiin khan a thi a, kum 88-a upa a ni. Kum 12 chhung Pope mawphurhna a chelh chhungin Pope Francis-a hi hrisel lohna chi hrang hrangin a tibuai a, Pneumonia vanga damdawi in-a hun engemawti chen a awm hnuah March ni 23 khan a chhuak a, nimirpiah Inrinni khan sawi lawk lovin St. Peter's Basilica-ah tawngtai turin a kal a, nimir Easter Sunday-kha mipui hmuha a inlan hnuhnunna ber niin St. Peter's Square-a mipui pungkhawmte hnenah Easter chibai a hlan a ni.

Pope Francis-a hi kum 2013-ah Pope atan lak luh niin Latin-America mi, he dinhmun chelh thei hmasa ber a ni a, miretheite ngaihsaktu leh Catholic Kohhran kalphung her danglamtu a ni.

Khawvel ram hrang hrang hruaituten Pope Francis an ui thu an sawi a, Prime Minister Narendra Modi-a pawhin paw i a tih thu sawiin khawvel puma catholic kohhran mite hnenah tawrhpuina a hlan a, Pope Francis-a chu mirethei leh mitlabal-te tana rawngbawltu, harsatna leh manganna tawkte nuna beiseina eng chhi nungtu a nih thu a sawi a ni.

Aizawl Bishop Most Reverend Stephen Rotluanga pawhin Mizorama Catholic kohhranten thinlung takin Pope Francis an sun thu a sawi a, Pope Francis chu kum 1936-a piang a nih thu sawiin a nun pum chu Lalpa leh kohhran tan a hmang zo a ni, a ti a, Pope Francis chuan tumruhna leh huaisenna nunpui turin mitin a chah a, abik takin rethei leh chanhai te hnena hmangaihna lantir chu a thupui ber a ni a ti. A thihna hi kohhranin thinlung taka an sun thu leh, a thlarau chu Pathian, zahngaihna tawp nei lo kutah an kawltir tih sawiin Lalpa hmangaihna ang chhungah chatuana chawl turin an tawngtai a ni, a ti bawk.

<><><>